



Alore e je lade cussì.

Nus vevin invidâts a cjaçe intune risierve dal alt Friûl. O jerin in trê, jo, Alfio e Carlon. Il miedi mi veve dit di non fâ strapaçs cumò che o soi in pension... di lassâ stâ i spagnolets, bevi di mancul e no cjapâ sudadis.

Bon.

Ta chê dì ce spac che o ai cjapât! E jere apene scomençade la stagjon che o cirivin cualchi jeur ma no si imagjinavin di intivâsi in dîs dodîs di lôr armâts cui mitra che a levin ator in mimetiche pes braidis come se a fossin in vuere! Carlon mi à dit che a son chei che a fasin la vuere fente. Forsi a vevin scunfinât lôr o forsi o vevin scunfinât nô, no si sa. A son passâts dongje di nô cence nancje calculânus e nô o vin continuât pe nestre strade cu la Lola che e nulive bon. Il pointer di Alfio invezit al jere lât bande di une cise. E alore vie daûr di lui no trê. Il pointer, Clodoaldo si clame, al tache a baiâ come un mat e la Lola e rive dongje e e fâs ancjetant. O rivin li de cise cu lis sclopis prontis e ve che al salte fûr un mostrat... un om cu la muse di fâ pôre, al jere come... une muse come di ragn cui dincj... adiudiu... o ai cjapât un spac! L'omenat cu al muse di mostri al è scjampât vie e dopo o vin sintût sparâ chei che a fasin la vuere fente... adiudiudiu ce pôre!

Carlon nol à spietât un moment e i à trat, ma nol devi vêlu cjapât, par fortune. Alfio invezit al à scugnût lâ dentri di un fossâl a netâsi dal spac, al à dite.

E jo nuie, no ai fat nuie.

O ai juste pensât che il miedi o nol jere tant brâf come miedi, o che nol veve reson, jessint che o vevi tignût bot.

A cjase o ai savût che chel che o vin viodût al jere un om; al veve la mascare di un di chei mostris che gno nevôt instupidît al combat cuant che al zuie cu la pleistescion... Prédator si clame... ma diu ce spacs di fâmi cjapâ!

In ogni câs, dopo di chê dì, no mi soi plui preocupât dal bevi e dai spagnolets, ma dome di no cjapâ sudadis. Chel propit no mi plâs.

***di Milio dai cjans***